

6. oktober 2008

UKA 2008/58
UPA 2008/128

**Suliffeqarfimmik ingerlatsinissamut tunniussisoqartillugu sulisartut inatsisit
naapertorlugit inissisimanerat pillugu Inatsisartut peqqussutissaattut
siunnersuut**

pillugu

Inatsisartut Inuussutissarsiornermut Ataatsimiititaliaata

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

**Inatsisartut Inuussutissarsiornermut Ataatsimiititaliaat suliarinninnermini
ukuninnga inuttaqarpoq:**

Inatsisartunut ilaasortaq Jonathan Motzfeldt, Siumut (siulittaasoq)
Inatsisartunut ilaasortaq Knud Kristiansen, Atassut (siulittaasup tullia)
Inatsisartunut ilaasortaq Ole Thorleifsen, Siumut
Inatsisartunut ilaasortaq Esmar Bergstrøm, Inuit Ataqatigiit
Inatsisartunut ilaasortaq Marie Fleischer, Attaviitsoq
Inatsisartunut ilaasortaq Thomas Kristensen, Atassut
Inatsisartunut ilaasortaq Jens B. Frederiksen, Demokraatit
Inatsisartunut ilaasortaq Jürgen Weyer Johansen, Siumut

Inatsisartut peqqussutissaattut siunnersuut ulloq 29. april 2008-mi
siullermeerneqarpoq, siullermeerinerullu kingorna Inuussutissarsiornermut
Ataatsimiititaliamit suliarineqartussanngorlugu innersuunneqarluni.

UPA 2008-imi siunnersuummik siullermeerineq tunngavigalugu
aalajangiiffigisassatut siunnersuut matumani pineqartoq Inatsisartut
Inuussutissarsiornermut Ataatsimiititaliaata misissorpaa.

Siunnersuutip imarisaa

Suliffeqarfimmik ingerlatsinissamut tunniussisoqartillugu sulisartut inatsisit naapertorlugit inissisimanerat pillugu Inatsisartut peqqussutissaattut siunnersuut Naalackersuisunit saqqummiunneqarpoq.

Naalackersuisut UPA 08/128-mut saqqummiussisutaanni ima allassimavoq:

Peqqussutissatut siunnersuut aallaaveqarpoq Inatsisartut 2006-imi ukiuakkut ataatsimiinnerannut atasumik aalajangiiffigisassatut siunnersuuteqartoqarneranik, oqaluuserisassani UKA 2006/55-tut siullermeerlugu saqqummiunneqartumik, suliffeqarfimmik ingerlatsinissamut tunniussisoqartillugu sulisartut inatsisitigut tungaveqartunik illersorneqarsinnaalernissaat siunertaralugu maleruagassioqartariaqartoq pillugu, aappasaaneerseqartumillu Inatsisartut 2007-imi ukiuakkut ataatsimiinneranni, ullormut oqaluuserisassani UPA 2007/10-tut, tassanilu paasineqarluni Danmarkimi suliffeqarfimmik ingerlatsinissamut tunniussisoqartillugu inatsit atuuttoq Kalaallit Nunaanni atortuulersinneqarsinnaanngitsoq, aammalu sulisartut suliffeqarfimmik ingerlatsinissamut tunniussisoqartillugu illersorneqarnissaat inatsisitigut aalajangersaavigineqarsimanngitsoq."

Peqqussutissatut siunnersuummut nassuiaatini aamma ima allassimasoqarpoq:

Siunnersuummi pingaarnertut siunertarineqartoq tassaavoq sulisartut suliffeqarfimmik tunniussisoqareernerata kingorna suliffeqarfimmik pineqartumik piginnittuulersumit aningaasarsiatigut atorfeqarnermilu atugarisatigut allannguutitaqarfiumngitsumik atugaqartinneqarnissaat isumannaarniarneqassammat. Siunnersuut malillugu sulisartut suliffeqarfimmik tunniussisoqarneranut atatillugu inatsiseqartitsinermi illersugaanerata tamanut atuuttumik aalajangersaaffigineqassaaq, tamatumunnga ilaallutik pisortat ingerlataqarfiinik, suliffeqarfimmik il.il. naamminersortut inatsisitigut maleruagassaat malillugit ingerlatsilernissaannut allannguinerit. Siunnersuut malillugu aalajangersarneqarpoq sulisitsisoq sulisunik suliffeqarfiup tunniunneqarnera kisiat tungavigalugu soraarsitsisinnaanngitsoq, tamatumani aamma pineqarpata pisortat ingerlataqarfiannik namminersortunngorsaaneq imaluunniit imminut pigisunngortitsineq.

Ilutigalugu suliffeqarfimmik piginnittuulersoq siunnersuut malillugu pisussaatinneqassaaq sulisartunut piginnittuulernerq pillugu paasissutissiinissamik, aammalu tamatuma sulisartut atugarisaannut malitsigiumaagassai pillugit. Paasissutissiineq sulisut sinniisaannut taamatullu aamma sulisartunut tamanut apuunneqassaaq, paasissutissiisussaaitaanermullu ilaapput tunniussinermut/piginnittuulernermut pissutaasut, tunniussineq/piginnittuulernerq piffissami ullormilu qaqugukkut pissanersoq, aammalu sulisartunut inatsisitigut, aningaasaqarnikkut

inuttullu atugarisatigut malitsigiумаagassaat, taamaatullu aamma pineqaatissiisutaasinnaasut, tunniussinermi/piginnittuulernermi imaluunniit allannguinermi sulisartunut sunniutaasussat.

Siunnersuutip tusarniaassutigineqarnera

Peqqussutissatut siunnersuut ilaatigut Kalaallit Nunaanni Sulisitsisut Peqatigiiffiannut (GA), Kalaallit Nunaanni Sulisitsisut Kattuffiannut (ILIK) NUSUKA-mullu tusarniaassutigineqarpoq. Tusarniaanermi akissutit tiguneqartut aallaavigalugit akissutit siunnersuummut sapinngisamik ilanngunniarneqarsimasut ataatsimiititaliap oqaatigissavaa. Taamaattumik tamatumunnga annertunerusumik oqaaseqaateqarnissaminut ataatsimiititaliaq tunngavissaqarsorinngilaq.

Siunnersuutip Inatsisartunit siullermeerneqarnera

Inatsisartut siunnersuummik siullermeerineranni siunnersuut Siumumit, Inuit Ataqtiginnit Atassummiillu taparserneqarpoq.

Aammattaaq siunnersuut Demokraatinit tigulluarneqarpoq, aaqquissuussinerminilli suliffeqarfimmut tiguneqartumut pisisup naleqqussaanissaanut tamanna periarfissiisagunangimmat pisortat suliffeqarfiutaannik tigusinissamut namminersortunit siunnersuut soqtiginnikkunnaartitsissanersoq ernumassutigalugu oqaatigineqarluni. Tassunga atatillugu nunatsinni sulisitsisut peqatigiiffii tamakkerlutik tusarniarneqassasut Demokraatinit kissaatigineqarpoq.

Ataatsimiititaliap suliarinninnera

Tunniussineq soraarsitsinissamut immiini tunngavissaannginnera pissutigalugu inuussutissarsiuteqartup sulisunik soraarsitsisinnaatitaanera siunnersuutikkut killilersorneqarpoq. Aningaasaqarnikkut, teknikikkut aaqquissuusaanikkullu allannguutiniq sulisunut piomasaaqatinik allanngortitsisunik tunngavilersuuteqarluni soraarsitsisoqarsinnaavoq.

Sulisorisanut ataasiakkaanut atatillugu piffissami tigusiffiusumi tunniussisup pisinnaatitaaffiiniq pisussaatitaaffiinillu suliffeqarfimmik tigusisoq akisussaasunngussasoq ataatsimiititaliamit oqaatigineqassaaq. Taamaalilluni suliffeqarfimmi tunniunneqartumi naleqqussaanissaq siunnersuutikkut mattunneqanngilaq. Suliffeqarfiup aaqquissuusaanerata naleqqussarnissaanut piginnittoq nutaaq suli periarfissaqarpoq. Piginnittut nikinnerata sulisut inatsisit naapertorlugit inissimanerannut akornusiinermut atorneqannginnissaa siunnersuutip pingaartumik qulakkeerpaa.

Aammattaaq sulisut piginnaatitaaffiiniq illersuinerup tassunga tunngasumik inatsisikkut isumagineqarnera pissutigalugu pisortat ingerlatsineranni namminersortunngorsaanernut aktiaateqarluniluunniit

ingerlatseqatigiiffingortitsinernut atatillugu suliffeqarfinnik tunniussinermi sulisorisat inatsisit naapertorlugit inissisimanerat pillugu inatsimmik pisariaqartitisoqarsimanngitsoq ataatsimiititaliamit paasineqarpoq. Taamatut pisoqartillugu inatsisitigut immikkut maleruaqqusaliormissap siunissami pisariaqarnissaa aamma naatsorsuutigineqarpoq, taamaalilluni peqqussutissatut siunnersuummut matumani pineqartumut sanilliullugu inatsit kingullertut taaneqartoq immikkut inatsisaanini pissutigalugu salliutinneqartussaataalluni.

Inuussutissarsiornermut Ataatsimiititaliap inassuteqaataa

Siuliani oqaatigineqartut siulianilu allassimasutut paasinnilluni siunnersuut **akuersissutigineqassasoq Inuussutissarsiornermut Ataatsimiititaliap isumaqatigiittup inassutigaa.**

Taama oqaaseqarluni Inatsisartut Inuussutissarsiornermut Ataatsimiititaliaata siunnersuut Inatsisartunut aappasaaniigassanngortippaa.

Jonathan Motzfeldt
Siulittaasoq

Knud Kristiansen
Esmar Bergstrøm

Ole Thorleifsen
Marie Fleischer

UKA 2008/58
UPA 2008/128
J.nr. 01.25.01/08EM-LABU-00058